

Konsellu Imprensa ka liberdade espresaun?

Hosi Juvinal Dias, NGO La'ó Hamutuk

Daudauk ne'e, Komisaun A Parlamentu Nasionál hala'ó hela audiénsia ba ezbosu Lei Imprensa ho sosiedade sivil, media na'in, asosiasaun jornalista sira, academia, inklui governante sira atu hato'ó sira nia analiza kona-ba vantajen no dezvantajen hosi lei ne'e ba demokrasia no direitus umanus iha Timor-Leste.

Iha pontu lubuk tan iha ezbosu Lei Imprensa ne'e mak prezisa atensaun hosi ita, maibé iha artigu ida ne'e, ha'u hakarak atu foka liu kona-ba Konsellu Imprensa tuir definisaun no kompeténsia tuir ezbosu lei ne'e no nia relasaun ho liberdade espresaun ema nian.

Ezbosu lei ne'e tau importánsia atu estabelese Konsellu Imprensa iha Timor-Leste. Maske Iha diskusaun ne'ebé *La'ó Hamutuk* (organizasaun ne'ebé hakerek na'in haknaar an), hala'ó ho Komisaun A Parlamentár mós hatudu katak Deputadu sira nia atensaun boot atu iha Konsellu Imprensa ida Timor-Leste.

Liafuan "Dewan Pers" ne'ebé lidera hosi Harmoko – Ministru Informasaun Indonézia durante rejime "Orde Baru" Suharto nian sei manas hela iha ita nia kakutak. "Dewan Pers" durante Suharto nia tempu ne'e sai fali instrumentu rejime nian atu halo sensura ba informasaun ne'ebé jornalista ida ka institutu ida hakarak atu fahe ba ema seluk. Sensura bele la'ó ho tipu oi-oin, ezemplu ida mak taka – "bredel" media sira hanesan TEMPO, EDITOR no DETIK iha 1994 tanba "vokál" liu hodi fó sai envolvimentu família B.J. Habibie nian iha kazu sosa ró funu hosi Alemaña, (Wardana, 2007).

Maske tuir ezbosu lei ne'e la envolve representante hosi Governu nian iha kompozisaun Konsellu Imprensa hanesan iha Indonézia molok 1999, maibé la signifika katak Konsellu Imprensa ida ne'e livre ona hosi influensia ukun nian. **Artigu 22.6** kona-ba "Finansiamentu ba Konsellu Imprensa nian asegura hosi dotasaun Orsamentu Jerál Estadu" bele sai indikadór ba risku hosi influensia polítiku na'in sira ba independénsia Konsellu nian, maske **alínea (7)** fó provizaun katak dotasaun OJE "labele afeta ba independénsia Konsellu Imprensa nian".

Buat seluk ne'ebé prezisa ita nia konsiderasaun mak, hili "Representante proprietáriu órgaun komunikasaun sosiál" nudár membru Konsellu Imprensa. Maske sira ne'e hili hosi jornalista sira rasik, maibé kompozisaun ida ne'e bele sai risku ba independénsia Konsellu nian atu hola desizaun ida, hanesan bele orienta desizaun konsellu nian ba interesse komersiál nian duke proteje direitu no liberdade ema hotu nian ba informasaun no imprensa. Membru Konsellu hosi na'in media nian bele foti desizaun ida ne'ebé la justu ba jornalista ida ka media seluk ne'ebé "komersialmente" kompete ho nia media rasik.

Kona-ba liberdade no direitu "atu buka, halibur, hili, tratamentu no fó informasaun, hanesan liafuan, imajen ka imajen no lian, ba ema hotu-hotu, knar Konsellu ne'e tuir ezbosu lei ne'e

fó ameasa ba ema nia direitu. Ezemplu, ema ida bele sai jornalista ida bainhira jornalista ne'e sidadaun Timor-Leste, iha ona kapasidade abilitasaun akadémiku ida ne'ebé hetan ona rekoñesimentu hosi Konsellu Imprensa, no hala'o knar iha media komunikaun sosiál ida **(Artigu 6)**.

Provizaun ida ne'e fó risku hodi la fó espasu ba ema sira ne'ebé la'ós ema Timor, la fó oportunidade ba ema ne'ebé iha kreatividade atu buka, halibur, hili, trata no fahe informasaun ba ema. ONG sira, ativista, Jornalista "Free-lance" ne'ebé laiha órgaun komunikaun "permanente" no Jornál alternativu sira bele hetan impaktu hosi ne'e, tanba sira ne'e dala ruma laiha "abilitasaun akadémiku no profisionál ida" ne'ebé hetan rekoñesimentu hosi Konsellu Imprensa. Modelu Jornál hanesan Klak Semanál, Claro Post (rua ne'e la la'o ona), ka Radio Maubere, Radio Direitu, Radio Timor Kmanek, website timorhauniadoben no seluk-seluk bele konsidera hanesan meius komunikaun "ilegál" maske sira fó informasaun ida ne'ebé hodi ajuda povu atu hatene notísia.

Iha "is" di'ak ne'ebé Prezidente Komisaun A fó sai, katak Lei Imprensa ida ne'e so aplika de'it ba media no na'in media lukrativu sira, la aplika ba "Jornál Parede" estudante sira, la aplika ba arte "dalan", ka publikasaun ka jornál ka boletín naun profit sosiedade sivil no ativista sira nian. Maibé hanoin ida ne'e tenke esplika klaru iha Lei ne'e rasik.

Parlamentu sira konsidera katak tenke iha lei imprensa ida atu asegura direitu "parte terseiru" hosi defamasaun ka proteje ema seluk nia reputasaun, no presiza iha Konsellu ne'e atu hala'o knar arbitrajen, mediador entre Jornalista ho parte terseiru ida ne'e. Maibé, atu proteje ema ida nia reputasaun hosi defamasaun, Timor-Leste iha ona Kódigu Sivil atu bele prosesa asuntu hanesan ne'e.

Maske, importante teb-tebes atu iha responsabilidade jornalista ba sira nia publikasaun, hasa'e sira nia kualidade no kapasidade, no mós regulaun ba sira ho profisaun jornalista, maibé ida ne'e la signifika katak tenke iha lei spesífiku ida hosi estadu atu haforsa Konsellu Imprensa atu regula atividade atu buka, halibur, hili, tratamentu no fó informasaun, hanesan liafuan, imajen ka imajen no lian, ba ema hotu-hotu.

Jornalista sira rasik, ka sira nia asosiasaun hanesan TLPU ka AJTL bele regula sira nia jornalista sira, deside sira nia Kódigu Étika rasik, organiza sira nia an rasik, no sira nia regulaun. No importante teb-tebes mak, Kódigu sira ne'e la aplika ka obriga ema sira seluk ne'ebé hala'o atividade imprensa nian maske sira la'ós "jornalista profisionál" atu halo tuir.

Atu remata, hakarak atu hateten katak Timor-Leste liu ona dékada ida la'o laho Lei Imprensa ida, no iha tempu ne'ebé hanesan ita la enfrenta problema ho imprensa no informasaun. Durante ne'e, Timor-oan sira hetan nia direitu no liberdade atu espresa opiniaun liu hosi meius komunikaun oi-oin ne'ebé ita asesu ba hafoin besik tinan atus lima nia laran moris iha presau no sensura nia laran. Obrigado,

(Hakerek na'in hela iha Dili, haknaar an iha NGO La'o Hamutuk, +670 7734-8703)